

U skladu sa članom 24. Statuta Općine Hadžići ("Službene novine Kantona Sarajevo", broj 15/09, 17/12, 10/13 i 14/13 - ispravka), te na osnovu Odluke Općinskog vijeća broj 01-01.2-8444/2013, od 10.10.2013. godine, Općinsko vijeće Hadžići, na 11. sjednici održanoj dana 21.11.2013. godine, d o n o s i

ODLUKU O STIPENDIRANJU UČENIKA I STUDENATA

OSNOVNE ODREDBE

Član 1.

Ovom Odlukom utvrđuju se osnove, način i kriteriji stipendiranja učenika i studenata visokoškolskog obrazovanja, koji imaju stalno mjesto boravka na području Općine Hadžići, a koji ne koriste stipendiju po drugom osnovu.

Do konačnog zakonskog definisanja studija po Bolonjskom procesu Općina će stipendirati studente dodiplomskog i postdiplomskog, odnosno bakalaureat i masters studija (3+2 i 4+1).

Član 2.

O stipendiranju učenika i studenata stara se Općinski načelnik putem Službe za opću upravu, društvene djelatnosti i zajedničke poslove i Službe za privredu, finansije i inspekcijski nadzor. Ovo podrazumijeva donošenje odluke o raspisivanju Konkursa čiji tekst je sastavni dio odluke, izradu prijavnog lista, obradu prijave i izbor kandidata, prijem i rješavanje žalbi po objavljenom bodovnoj listi, donošenje konačne Odluke o dodjeli stipendija, te isplata istih.

SREDSTVA

Član 3.

Sredstva za stipendiranje učenika i studenata planiraju se Budžetom Općine Hadžići.

IZBOR KANDIDATA

Član 4.

Izbor kandidata za stipendiranje vrši se na osnovu prijave na konkurs. Obrazac prijave se sačinjava na osnovu odredbi ove Odluke.

Konkurs sadrži uslove koje kandidati moraju ispunjavati, broj kandidata koji se stipendiraju, rok za podnošenje prijave i druge podatke. Konkurs se objavljuje u dnevnim novinama, web stranici i na oglasnoj ploči Općine Hadžići.

Član 5.

Izbor kandidata vrši Općinski načelnik, putem Službe za opću upravu, društvene djelatnosti i zajedničke poslove, a na osnovu kriterija utvrđenih ovom Odlukom, odnosno bodovne liste urađene na osnovu ovih kriterija.

Bodovna lista se oglašava na oglasnoj tabli i Web stranici Općine.

Svaki učesnik u konkursu može u roku od 8 dana od dana objavljivanja bodovne liste podnijeti prigovor na istu.

Prigovor se podnosi Općinskom načelniku koji donosi konačnu odluku.

STIPENDIRANJE

Član 6.

Stipendije se dodjeljuju za jednu školsku godinu, a isplaćivat će se u deset (10) mjesečnih rata. Za svaku školsku godinu se donosi odluka o raspisivanju konkursa za dodjelu stipendija.

Član 7.

Visina mjesečne stipendije utvrđuje se u iznosu od 100,00 KM za studente i 50,00 KM za srednjoškolce. Svake godine stipendirat će se 40 srednjoškolaca i to za svaki razred po deset učenika i 45 studenta, i to: I-II-III god. po deset stipendija; IV- sedam, V-pet i VI- tri stipendije. Ukoliko se za određeni razred-godinu ne prijavi dovoljan broj učenika- studenata koji ispunjavaju uslove, stipendije za taj razred-godinu se raspoređuju na ostale razrede-godine od najvišeg do najnižeg razreda-godine.

Ukoliko budžetska sredstva budu dozvoljavala, broj stipendista može biti i veći, ili se novčani iznosi mogu povećavati, što se određuje u Odluci o raspisivanju konkursa za određenu školsku godinu.

Član 8.

Stipendije se ne dodjeljuju kandidatima:

- Vanredni učenici-studenti
- koji se već stipendiraju iz drugih izvora
- za dva ili više kandidata iz iste porodice
- kandidati koji ponavljaju tekuću školsku godinu (više puta upis na tekuću godinu studija)
- kandidati stariji od 25 godina starosti, izuzev fakulteta šestogodišnjeg redovnog studija (ne odnosi se na master studij)

KRITERIJI ZA DODJELU STIPENDIJA

Član 9.

1. Uspjeh u srednjoj školi 4,00 (40 bodova) – 5,00 (60 bodova), a na fakultetima 7,00 (30 bodova) – 10,00 (60 bodova) je eliminatorni uslov za aplikaciju kandidata na konkurs.
2. Status
 - kandidati bez oba roditelja, a da je jedan ili oba roditelja poginuo kao pripadnik OS BiH – 15 bodova
 - kandidati bez oba roditelja – 10 bodova
 - djeca šehida – 10 bodova
 - kandidati invalidi preko 50% kao i djeca RVI preko 50% invaliditeta – 5 bodova
 - kandidati invalidi do 50% kao i djeca RVI do 50% invaliditeta – 3 boda
 - djeca demobilisanih boraca – 2 boda

Bodovanje za kategorije iz tačke 2. vršiće se samo po jednom od navedenih osnova.

3. Socijalni status (25 bodova)

- Socijalni status se utvrđuje na osnovu novčanih primanja domaćinstva koja su limitirana na 150,00 KM po članu domaćinstva. Bodovanje se utvrđuje prema formuli:

$$25 \times \left(1 - \frac{\text{po članu domaćinstva}}{150}\right), \text{ što znači da primanja po članu domaćinstva}$$

od 150,00 KM i više imaju nula bodova, a primanja ispod 150,00 KM po članu domaćinstva shodno prosjeku mogu imati najviše do 25 bodova (bez primanja).

Član 10.

Raniji stipendisti koji su upisali slijedeću godinu, a ispunjavaju uslove konkursa, konkurišu za dodjelu stipendije kao i ostali kandidati.

PRELAZNE I ZAVRŠNE ODREDBE

Član 11.

Ova Odluka stupa na snagu po dobijanju saglasnosti od strane Općinskog vijeća Hadžići, a primjenjivat će se počev od 01.11.2013. godine.

Broj: 01-01-2-9576/2013
Hadžići, 21.11.2013.godina

Predsjedavajući
Općinskog vijeća Hadžići

Adnan Proha